

四庫全書

經部

欽定四庫全書

讀禮通考卷四

刑部尚書徐乾學撰

喪期四

乾學案讀禮始喪期何也曰古民質無有喪期後代聖人因天地萬物有終始而為之制其說以期為斷父至尊母至親故加隆以盡孝子之恩加之則倍故再期也喪服小記云再期之喪三年也期之喪二年也九月七月

之喪三時也五月之喪二時也三月之喪一時也喪期盡於此矣三年問云三年之喪何也曰稱情而立文因以飾羣又曰三年之喪人道之至文者也夫是之謂至隆是故因貴賤親疎之節而定為再期期年九月五月三月之期有再期期年九月五月三月之期而制為斬衰齊衰大功小功緦麻之服古今不能損益百王不能同異聖人所以經緯萬端

皆從此始也其統紀在三年之喪三年之喪
達喪也禮所自生也親親之中有尊尊長長
之道焉或引而近之或推而遠之以三為五
以五為九上邇高祖下迄玄孫旁及三從兄
弟而後親親之道以畢三年之喪其本根餘
則其枝葉也然枝葉凋則本根危矣故三年
之喪不祭不弔人不與人饋奠而於輕服之
親必服其服而往篤親厚終之誼有不知其

所以然者也詩曰凡民有喪匍匐救之孔子
謂無服之喪可以施四國畜萬邦凡民之喪
尚欲賙恤況於親乎故治天下國家者於喪
紀也必慎之重之自戚以及疎由本以及末
如網在綱有條不紊民之所由生禮為大禮
主於敬不可忽也子貢問喪孔子曰敬為上
哀次之王戎阮籍之徒非不哀也而猖狂無
忌憚至為名教罪人則亦不敬而已矣

斬衰三年上

儀禮喪服篇父

賈公彥疏先陳父者此章恩義並設義由恩出故先言父也

爾雅父為考

白虎通父矩也以度教子也

又為考考成也言有成德

喪服傳為父何以斬衰也父至尊也

疏父至尊者天無二日家無二尊父

是一家之尊尊中至極故為之斬也

坊記喪父三年

檀弓事親有隱而無犯左右就養無方服勤至死致喪

三年

鄭康成注隱謂不稱揚其過失無犯謂不犯顏而諫左右謂扶持之方猶常也勤勞辱之事致謂戚

容稱其服此以恩為制也孔穎達疏致之言至也謂哀情至極以居喪禮

方慤曰就養者就而養之且不離也服勤者服其勤勞而不釋也於養言左右則養無所不至矣於勤言至死則勤無時或已矣致喪者言盡其所至也

馬晞孟曰致喪之禮

顏色稱情戚容稱服

胡銓曰方猶所也不擇地而安之致謂哀到

論語曾子曰吾聞諸夫子人未有自致者也必也親喪乎

馬融曰言於親

喪必有致盡

子游曰喪致乎哀而止

疏言父母之喪當致極哀戚不得過毀

孝經子曰孝子之事親也居則致其敬養則致其樂病

則致其憂喪則致其哀祭則致其嚴五者備矣然後能

事親

註平居必致其敬就養能致其懼致其憂色不滿容行不正履致其哀擗踊哭泣盡其哀情致其嚴

齋戒沐浴

明發不寐

董鼎曰致者推

之而至其極也

崔銑曰喪致乎哀而止蓋言無所不用其情而後已
是故慟悼哀之發於心者也羸黑擗踊哀之發於容
體者也粥與水哀之發於飲食者也齋斬哀之發於
衣服者也若凶哀之發於居處者也致云者推而極

之也五者一不至不可謂致欲短喪者何忍也然孝子之心易窮故曰有終身之喪或曰而止者不可毀以滅性也論者因記禮之詞而譏其過高者未然也朱彞尊曰論語孝經所言致字義正與檀弓致喪之義相發明而註疏家均未之及

中庸父母之喪無貴賤一也

呂大臨曰子之事親所以自致其誠不可以尊卑變也

朱子曰父母之喪上下同之推己以及人也

喪服四制其恩厚者其服重故為父斬衰三年以恩制

者也

注詳二
十七卷

三年問三年之喪何也曰稱情而立文因以飾羣別親

疏貴賤之節而弗可損益也故曰無易之道也

注稱情而立文

稱人之情輕重而制其禮也羣謂親之黨也無易猶不易也疏立文禮之節文也飾謂表章也羣謂五服之親也因此三年之喪差降各表其親黨親謂大功以上疏謂小功以下貴謂天子諸侯絕期卿大夫降期以下賤謂士庶人服族其節分明創鉅者其日久痛甚者其不可損益故曰無易之道

愈遲三年者稱情而立文所以為至痛極也斬衰苴杖

居倚廬食粥寢苦枕塊所以為至痛飾也

注飾情之章表也疏鉅

大也創小則易差創大則難愈也賢者喪親傷腎乾肝斬斫之痛其痛既甚其差亦遲故稱其痛情而立三年

之文以表是至痛極者也

三年之喪二十五月而畢哀痛未盡思慕

未忘然而服以是斷之者豈不送死有已復生有節也

哉

注復生除喪反生者之事也

疏言賢人君子於此

猶未能忘而外貌喪服以是割斷若不斷以二十五月則孝子送死之情何時得已復吉常之禮何有限節故聖人裁斷止限二十五月豈不是送死

凡生天地之間

須有已止反復生禮須有限節者哉

者有血氣之屬必有知有知之屬莫不知愛其類今是

大鳥獸則失喪其羣匹越月踰時焉則必反巡過其故

鄉翔回焉鳴號焉躅躅焉跼蹐焉然後乃能去之小者

至於燕雀猶有啁噍之頃焉然後乃能去之故有血氣

之屬者莫知於人故人於其親也至死不窮

注匹偶也言燕雀之

思不如大鳥獸大鳥獸不如人含血氣之類人最有知而思深也於其五服之親念之至死無已止疏天地之間血氣之類皆有所知至於鳥獸小大各能思其種類沉在於人何有窮止也將由夫患邪

淫之人與則彼朝死而夕忘之然而從之則是曾鳥獸

之不若也夫焉能相與羣居而不亂乎

註言惡人薄於思死則忘之其

相與聚處必失禮也疏此明小人曾鳥獸之不若若不以禮節之焉能羣居而不亂

將由夫修

飾之君子與則三年之喪二十五月而畢若駟之過隙

然而遂之則是無窮也

注駟之過隙喻疾也遂之謂不時除也疏此明賢人君子於

三年之喪若駟之過隙駟馬駿疾空隙狹小以駿疾而過狹小言急速之甚若不以禮節制之則哀痛何時窮

已故先王焉為之立中制節壹使足以成文理則釋之

矣

注立中制節謂服之年月也釋猶除也去也疏小人君子其意不同故先王為之立中人之制節以為

年月限節壹謂齊同言君子小人皆齊同使足以成文章義理也然則何以至期也

注言

三年之義如此則何以有降至於期也期者謂為人後者父在為母也疏鄭意以三年之喪何以有降至於

期者故云為人後者為本生之父母及父在為母今尋經意至親以期斷是明一期可除之節故禮期而練男

子除經婦人除帶下云加隆故至三年經意不據為人後及父在為母期鄭之此釋恐未盡經意但既祖鄭學

今因而釋之

曰至親以期斷

注言服之正雖至親皆期而除也疏謂至親本以期斷故雖

為人後及父在為母但一期也

是何也

注問服斷於期之義也

曰天地則已易矣

四時則已變矣其在天地之中者莫不更始焉以是象

之也

注法此變易可以期也疏言期是一年之周匝而天氣換矣前時已畢今時又來是變改矣其在

天地之中動植之物無不於前事之終更為今事之始也聖人以人事法象天地故期年而已也

然則

何以三年也

注言法此變易可以期何以乃三年為

曰加隆焉爾也焉使

倍之故再期也

注言於父母加隆其恩使倍期也下焉猶然疏加隆焉爾者本實應期但子

加恩隆重故三年也焉使倍之者焉猶然也子既加隆於父母故倍之至再期也

由九月以下

何也曰焉使弗及也

注言使其恩不及父母

故三年以為隆總小

功以為殺期九月以為間上取象於天下取法於地中

取則於人人之所以羣居和壹之理盡矣

注取象於天地謂法其變

易也自三年以至總皆歲時之數也言既象天地又足以盡人聚居純厚之恩也疏三年以為隆者謂恩愛隆重總小功以為殺者謂情理殺薄期九月以為間者是隆殺之間也上取象於天下取法於地天地之氣三年一閏是三年者取象於一閏天地一期物終是一期者取象於一周九月者以象陽之數又象三時而物成也五月以象五行三月者取象天地一時而氣變是皆取法於天地中取則於人者子生三年然後免於父母之懷故服三年入之一歲情意變改故服一期九月五月三月之屬亦逐人情而減殺是中則於人故能調和

羣衆聚居和諧專
壹義理盡備矣

故三年之喪人道之至文者也夫是

之謂至隆

注言三年之喪喪禮之最盛也 疏三年喪禮於人道之中至極文理之盛者則期以下

非其至極也至隆者恩之至極隆厚也

是百王之所同古今之所壹也未

有知其所由來者也

注不知其所由來喻此三年之喪前世行良久矣 疏未有知其所

由來者言三年之喪行之自遠未能識知從何代而來

孔子曰子生三年然後免

於父母之懷夫三年之喪天下之達喪也

注達謂自天子至於庶人

方慤曰其生也父母有三年之愛於其子及其沒也故子有三年之喪以報之愛所謂情也三年之喪所謂文也故曰稱情而立文禮以情為本而以文為飾故曰因以飾羣羣則莊子所謂人羣是也服君與父

皆斬衰三年由父而降則殺焉所以別親疎之節也由君而降亦殺焉所以別貴賤之節也親與貴者不可易而損之疏而賤者不可易而益之故曰弗可損益無易之道也送死者之禮有已復生者之事有節則不以死傷生故也

顧湄曰有所垂之謂象有所效之謂法有所作之謂則喪五服皆取陽數奇者方性夫曰陽所以致生陰所以致死之死而致生之孝子不忍死其親之意也其說精矣焉使倍之注訓焉為然陸農師訓是左傳晉鄭焉依國語作是知之陸德明釋文則云發聲也較直捷無甚意義

論語宰我問三年之喪期已久矣君子三年不為禮禮必壞三年不為樂樂必崩舊穀既沒新穀既升鑽燧改

火期可已矣子曰食夫稻衣夫錦於女安乎曰安女安則為之夫君子之居喪食旨不甘聞樂不樂居處不安故不為也今女安則為之宰我出子曰予之不仁也子生三年然後免於父母之懷夫三年之喪天下之通喪也予也有三年之愛於其父母乎

繆協曰爾時禮壞樂崩三年不行宰我大懼其往以為聖人無微旨以戒將來故假時人之謂啟憤於夫子義在屈己以明道也

尹焞曰短喪之說下愚且恥言之宰我親學聖人之門而以是為問者有所疑於心而不敢強焉爾

范祖禹曰喪雖止於三年然賢者之情則無窮也特以聖人為之中制而不敢過故必俯而就之非以三年之喪為足以報其親也所謂三年而後免於父母之懷特以責宰我之無思欲其有以跂而及之爾

春秋公羊傳三年之恩疾矣

何休注疾痛

非虛加之也以人

心為皆有之

孟子齊宣王欲短喪公孫丑曰為期之喪猶愈於已乎

註齊宣王以三年之喪為太長久欲減而短之因公孫丑使自以其意問孟子既不能三年喪以期年差愈於止而不行孟子曰是猶或紵其兄之臂子謂之姑徐徐

喪者也

云爾亦教之孝弟而已矣

注紵戾也孟子言有人戾其兄之臂為不順也而子謂之

曰且徐徐云爾是豈以徐徐之為差者乎
不若教之以孝弟勿復戾其兄之臂也

滕定公薨世子謂然友曰昔者孟子嘗與我言於宋於
心終不忘今也不幸至於大故吾欲使子問於孟子然

後行事

註定公文公文父也
然友世子之傳

然友之鄒問於孟子孟子曰

不亦善乎親喪固所自盡也曾子曰生事之以禮死葬
之以禮祭之以禮可謂孝矣諸侯之禮吾未之學也雖
然吾嘗聞之矣三年之喪齊疏之服飭粥之食自天子
達於庶人三代共之

注孟子言我雖不學諸侯之禮嘗
聞師言三代以前君臣皆行三年

之喪然友反命定為三年之喪父兄百官皆不欲曰吾宗

國魯先君莫之行我先君亦莫之行也至於子之身而

反之不可

註父兄百官滕文同姓異姓諸臣也皆不欲使世子行三年

朱子集注父兄同姓老臣也滕與魯俱文王之後而魯祖周公為長兄弟宗之故滕謂魯為宗國也然謂二國不行三年之喪者乃其後世之失非周公之法本然也

且志曰喪祭從先祖曰吾有所受之也

注志記也周禮小史掌邦國之

志曰喪祭之事各從其先祖之法言我轉有所受之不可於己身獨更改也

謂然友曰我他

日未嘗學問好馳馬試劍今也父兄百官不我足也恐

其不能盡於大事子為我問孟子然友復之鄒問孟子

孟子曰然不可以他求者也孔子曰君薨聽於冢宰歆

粥面深墨即位而哭百官有司莫敢不哀先之也

注孟子言

如是不可用他事求也喪尚哀惟當以哀戚戚之耳國君薨委政冢宰大臣嗣君但盡哀情歆粥不食顏色深墨深甚也墨黑也即位而哭百官有司莫敢不哀者以君先哀之也上有好者下必有甚

焉者矣君子之德風也小人之德草也草尚之風必偃

是在世子然友反命世子曰然是誠在我五月居廬未

有命戒百官族人可謂曰知

註諸侯五月而葬未葬居倚廬於中門之外也未有

命戒居喪不言也異姓同姓之臣可謂曰知世子之能行禮也及至葬四方來觀之顏

色之戚哭泣之哀弔者大悅

注四方諸侯之賓來弔會者見世子之憔悴哀戚大

悅其孝行之高美也

林氏曰孟子之時喪禮既壞然三年之喪惻隱之心痛疾之意出於人心之所固有者初未嘗忘也惟其溺於流俗之弊是以喪其良心而不自知耳文公見孟子而聞性善堯舜之說則固有啟發其良心矣是以至此而哀痛之誠心發焉及其父兄百官皆不欲行則亦反躬自責憚其前行之不足以取信而不敢有非其父兄百官之心雖其資質有過人者而學問之力亦不可誣也及其斷然行之而遠近見聞無不悅服則以人心之所同然者自我發之而彼之心悅誠服亦有所不期然而然者人性之善豈不信哉

喪服小記大夫降其庶子其孫不降其父

疏大夫降其庶子故為其

庶子不為大夫者服大功也而喪服條例云父之不服子亦不敢服大夫不服其妾故妾子為母大功也今嫌既降其子亦厭其孫故此明雖降庶子而不厭降其孫矣庶子之子不降其父猶為三年也

雜記大夫為其父母兄弟之未為大夫者之喪服如士

服士為其父母兄弟之為大夫者之喪服如士服

注大夫雖

尊不以其服服父母兄弟嫌若踰之也士謂大夫庶子為士者也已卑又不敗服尊者之服今大夫喪服禮逸與士異者未得而備間也春秋傳曰齊晏桓子卒晏嬰薨衰斬直經帶杖管簋食粥居倚廬寢苫枕草其老曰非大夫之禮也曰唯卿為大夫此平仲之謙也言已非大夫故為父服士服耳廬衰斬者其縷在齊斬之間謂

縗如三升半而三升不緝也斬衰以三升為正微細馬則屬於麤也然則士與大夫為父服異者有麤衰斬枕草矣其為母五升縗而四升為兄弟六升縗而五升乎唯大夫以上乃能備儀盡飾士以下則以臣服君之斬衰為其父以臣從君而服之齊衰為其母與兄弟亦以勉人為高行也大功以下大夫士服同疏大夫之父母兄弟或作士或無官今不以大夫之服服之是嫌畏踰之也云大夫庶子為士者若大夫適子雖未為士猶服大夫之服故知此士是庶子以己卑不敢服尊者之服也麤衰斬者齊即麤也言其布縗在齊斬之間斬衰三升麤衰四升其布在三升四升之間縗之麤如三升半而計縗唯三升也縗如三升半是麤不緝是斬故云斬衰以三升為正微細馬則屬於麤也然則士與大夫異者鄭約要嬰麤衰斬枕草之事明之也并及為母為兄弟者鄭既約士之父服縗約降一等經文有母及兄弟故此約母與兄弟之服也喪服為母四升此云五升

縷謂麤細似五升之縷成布四升喪服為兄弟五升此
云六升縷謂麤細如六升之縷成布五升皆謂縷細成
布升數少也云士以下以臣服君之斬衰為其父以臣
從君而服之齊衰為其母與兄弟者凡義服皆降正服
一等今為父母兄弟降從義服是卑屈也云勉人為高
行者居喪之禮以服重為中以服輕為屈一是勉勵其
父母兄弟使為高行作大夫一是勉勵士身使為高行
作大夫也案聖證論王肅云喪禮自天子以下無等故
曾子云哭泣之哀齊斬之情饘粥之食自天子達且大
國之卿與天子士俱三命平仲之言唯卿為大夫謂
諸侯之卿當天子之大夫非謙詞也春秋之時尊者尚
輕簡喪服禮制遂壞羣卿專政晏子惡之故服麤衰枕
草云唯卿為大夫者遜辭以避害也又孟子云諸侯之
禮三年之喪齊疏之服飭粥之食自天子達於庶人三
代共之又此記云端衰喪車皆無等則大夫與士異者
大夫以上在喪斂時升經士冠素委貌也馬昭答王肅

引雜記云大夫為其父母兄弟之未為大夫者之服如士服是大夫與士喪服不同而肅云無等則是背經說也張融評云士與大夫異者皆是亂世尚輕涼非王者之遠禮鄭言讜者不異於遠害融意以王肅與鄭其義略同如融之說是周公制禮之時則上下同當喪制無等至後世以來士與大夫有異故記者載之鄭因而解之今申鄭義云端衰喪車無等者端正也正為衰之制度上下無等其服精麤卿與大夫有異也又曾子云齊斬之情據其情為一等無妨服有殊異耳若王肅之意大夫以上弁經士唯素冠此亦得施於父母此經云為昆弟豈亦弁經素冠之異乎此是肅之不通也杜元凱註左傳說與王肅同服度註左傳與端衰喪車無等其老之問晏子之答皆為非竝與鄭違今所不用也

方慤曰生者貴而死者賤則其服從生嫌若僭之故也生者賤而死者貴則其服從生嫌若僭之故也

葉夢得曰古者喪服大夫士必有異制禮經皆不載鄭氏引晏平仲居喪證父母兄弟之未為大夫者服士服蓋不欲以尊踰之也而桓子亦大夫矣晏氏之老以為非大夫禮則平仲之服士服也當時諸國蓋多行短喪而況其服是以平仲矯之不欲斥人之過姑自抑答以鄉然後為大夫大夫與士之禮其必以精麤為辨歟

黃幹曰案父母之服自天子達於士一也而

記禮者之言乃如此當以王肅之言為正

陸佃曰據此大夫喪服士有不如也既夕禮曰衰三升寢苦枕塊則古者士服斬衰寢苦枕塊大夫麤衰斬寢苦枕草是歟當晏子時士僭大夫大夫以上喪服益輕故嬰麤衰斬枕草反古之道家老視時以為非也問傳曰斬衰三升齊衰四升五升六升齊衰四升蓋士以下則五升大夫六升諸侯天子齊衰之別也

若斬衰則兩等喪服所謂衰三升三升有半三升有半大夫以服斬之衰歟

大夫之適子服大夫之服

注仕至大夫賢著而德成適子得服其服亦尊其適象賢

疏明大夫適子雖未仕官及為士皆得服大夫之服

大夫之庶子為大夫則為其父母服大夫服其位與未

為大夫者齒

註雖庶子得服其服尚德也使齒於士不可不宗適疏此庶子雖為大夫其年長

於適子猶在適子之下使適子為主若年少於適子則固在適子之下是不可不宗適也

方慤曰大夫之適子雖為士服大夫之服而不嫌於重者適故也至於庶子身為大夫雖服大夫之服其位猶與未為大夫者齒蓋長幼之序不可以貴賤廢故也

左傳襄公十七年齊晏桓子卒晏嬰麤衰斬

杜預註斬不緝之也

衰在冑前麤三升布

苴經帶杖管屨

陸德明釋文以苴為經及帶杖竹杖也禮記云苴竹杖也

食粥居倚廬寢苦枕草

註此禮與士喪禮略同其異惟枕草耳然枕凶亦非喪服正文

其老曰非大夫之禮也

註時之所行士及大夫衰服各有不同晏子為大夫而行士禮

其家臣不解故譏之

曰唯卿為大夫

註晏子惡直己以斥時失禮故孫辭略答家老孔穎達

疏檀弓云魯穆公之母卒使人問於曾申曾申對曰哭

泣之哀齊斬之情饘粥之食自天子達然則天子以下

其服父母尊卑皆同無大夫士之異晏子所行是正禮

也言唯卿得服大夫服我是大夫得服士服又言己位

卑不得從大夫之法者是惡其直己以斥時之失禮故

孫辭略答家老也家語曾子問此事孔子云晏平仲可

謂能辟害也不以己是而駁人之非孫辭以辟咎義也夫家語雖未必是孔子之言要其辭合理故王肅與杜皆為此說鄭玄以雜記之文士為父母兄弟之服不得與大夫同皆縷細降一等其縷數與大夫同但雜記之文記當時之制以當時大夫與士有異故為此解非杜義也

晏子春秋晏子居晏桓子之喪麕衰斬苴經帶杖管屨食粥居倚廬寢苦枕草其家老曰非大夫喪父之禮也晏子曰唯卿為大夫曾子以問孔子孔子曰晏子可謂能遠害矣不以己之是駁人之非遜辭以避咎義也夫

王志長曰三年之喪違乎天子古今之通義也周公喪服首斬而父又為斬中之正考其服制別無尊卑差降之法自後有士服大夫服之說父母之喪以爵之貴賤為降殺至雜記云士之子為大夫則其父母弗能主也使其子主之無子則為之置後所謂舜臣瞽瞍齊東野人之語耳晏嬰服父喪其老以為非大夫之禮嬰云唯卿為大夫鄭氏謂此嬰之謙也是亦後世禮壞樂崩之論豈可訓哉喪服固周公之舊也

乾學案父母之喪無貴賤一也天子且上達

大夫安得獨異雜記所云當是末世之敝觀

孔子論晏平仲可知鄭氏亦言大夫與士異

者未得備聞止疑龕衾縗在齊斬之間王肅

致疑在喪斂時弁經素妻貌之異然則服或有精麤而喪期則未之有改也張融以為士與大夫異皆是亂世尚輕涼非王者之達禮而馬昭反斥為背經孔氏亦詆其不通非以不悖為悖者與且禮記左氏傳皆孔氏作疏乃於記力詆王肅於傳則又是之可見義有所屈而張融之說洵不易之論也

說苑齊宣王謂田過曰吾聞儒者喪親三年喪君三

年君與父孰重田過對曰殆不如父重王忿然怒曰然則胡為去親而事君田過對曰非君之土地無以處吾親非君之祿無以養吾親非君之爵位無以尊顯吾親受之君致之親凡事君所以為親也宣王邑邑而無以應

乾學案易傳有父子然後有君臣有君臣然後有上下有上下然後禮義有所錯故喪禮之重莫先於父不易之道也

唐開元禮宋政和禮溫公書儀朱子家禮明孝慈錄

會典今律文同

喪服諸侯為天子

疏此文在父下君上者此天子不兼餘君君中最尊故特著文於上也

曲禮君天下曰天子

疏父天母地是上天之子又為天所命子養下民

沈煥曰曰天子則非自私之辭

喪服傳天子至尊也

疏天子至尊同於父也

周禮司服凡喪為天王斬衰

疏凡喪者諸侯諸臣皆為天王斬衰

易袂曰天王有父道諸侯羣臣為服亦猶人子之為父服也

王昭禹曰天王有父道故諸臣服斬衰以王為天也若諸侯之大夫自天其君則為王總衰而已

乾學案疏云諸侯謂分封列國者諸臣則仕於王朝之卿大夫士也其中有寰內諸侯故禮但言諸侯為天子而諸臣統於其中若諸侯之大夫則為天王總衰不在此列矣

昏義天子脩男教父道也故為天王服斬衰服父之義也

葉夢得曰天子以男教勉天下之為子者其道猶父故其卒則天下為之斬衰報其義也

服問君為天子三年夫人如外宗之為君也世子不為

天子服

註外宗君外親之婦也其夫與諸侯為兄弟服斬妻從服期諸侯為天子服斬夫人亦從服期

喪大記曰外宗房中南面世子不服遠嫌也與畿外之民同也疏君外親之婦者其夫既是君之外姓其婦

即是外宗也熊氏云凡外宗有三案周禮外宗之女有爵通卿大夫之妻一也雜記云外宗為君夫人猶內宗

是君之姑姊妹之女舅之女從母之女皆為諸侯服斬為夫人服期是二也此文外宗是諸侯外親之婦也若

姑之子婦從母之子婦其夫是君之外親為君服斬其婦亦名外宗為君服期是三也內宗有二者案周禮云

內女之有爵謂其同姓之女悉是一也雜記云內宗者是君之五屬之內女是二也

檀弓天子崩三日祝先服

註祝佐舍飯先服

五日官長服

註官長大

夫士七日國中男女服

注庶人

三月天下服

注諸侯之大夫疏祝大祝商

祝也國中男女謂畿內民及庶人在官者齊衰三月而除之必待七日者天子七日而殯殯後嗣王成服故民得成服也天下服者謂諸侯之大夫為王總衰既葬而除之也近者亦不待三月今據遠者為言耳

方慙曰此所謂服特指杖耳祝先服者力勞而先病故也言祝先服則子可知矣官長以對祝言之則力有勞逸以對子言之則恩有重輕故五日而後服杖也十日國中男女服三月天下服言各服其所服之服非謂杖矣蓋不特恩有重輕故服有先後亦以地有遠近而聞訃有早晚故也

唯天子之喪有別姓而哭

注使諸侯同姓異姓庶姓相從而為位別於朝覲來時朝

覲爵同同位疏朝覲爵同
同位則不分別同姓異姓

春秋隱公三年三月庚戌天王崩

疏天王之喪諸侯不得越竟而奔脩服於

其國卿共

弔葬之禮

孫復曰春秋天王崩書葬者五桓襄匡簡景是也不書葬者四平惠定靈是也不書崩不書葬者三莊僖項是也書葬者皆非常也不書葬者皆得常也不書崩不書葬者周室微弱失不告也

胡安國曰諸侯為天王服斬衰禮當以所聞先後而奔喪今平王崩周人來訃而隱公不往是無君也其罪應誅不書而自見矣或曰萬國至衆也封疆至重也天王之喪不得越竟而奔而脩服於國卿共弔葬之禮訖葬卒哭而除喪禮乎案周書康王之誥太保率西方諸侯入應門左畢公率東方諸侯入應門右再拜趨出王反喪服此奔成王之喪者安得以為脩服於國而可乎

張洽曰喪服斬衰三年諸侯為天子之服也天王之喪同軌畢至為臣子者以所聞先後奔喪禮也隱公聞喪而不奔春秋以來送終之禮薄矣

家鉉翁曰或謂天子之喪諸侯不能越境而奔脩服於其國愚以為此後世郡縣之禮而律古者封建之國恐不得同也胡氏引康王之誥為說此論當矣

汪克寬曰秦昭襄之薨韓桓惠王衰經入弔祠春秋諸侯之事天子不若戰國之君事大國之禮也

桓公十有五年三月乙未天王崩

註桓王也

趙匡曰後莊王僖王不書崩見魯不赴諸侯不臣

夏四月己巳葬齊僖公

王孫曰王八年之間三道使來聘恩禮厚矣今王崩來赴魯無奔喪會葬之事齊僂之存于戈歲尋卒則會葬如禮比例以觀不貶而惡自見

宣公二年冬十月乙亥天王崩

註匡王也

三年春王正月郊牛之口傷改卜牛牛死乃不郊

胡安國曰禮為天王服斬衰周人告喪於魯史策已書而未葬也祀帝於郊夫豈其時而或謂不以王事廢天事禮乎春秋以來喪紀寢廢有不奔王喪而遠適他國有不脩吊禮而自相聘問固將以是為可舉而不廢也卒至漢文以日易月後世不能復其所由來漸矣春秋備書其義自見

張洽曰周公郊祀后稷以配天為成王制禮耳非魯之所得用也況有三年之喪乃臣子斬衰奔赴之時

豈可僭天子越紼行事之禮此春秋所以特書之并書猶三望以譏其可已而不已也

汪克寬曰天王崩三月天下服王崩至是已三月海內諸侯皆當斬衰直經杖絞帶冠繩纓管屨魯為同姓之宗國而不服其服則無王也郊之祭也喪者不敢哭凶服不敢入國門苟釋凶服而從事於大禮是慢天也且天子嘗禘郊社蓋蓋既陳諸侯祭社稷俎豆既陳聞天子崩后之喪皆廢其禮況可聞喪而猶治祭事乎

十月公如齊五月公至自齊

胡安國曰天王之喪不奔欲行郊禮而汲汲於奔齊惠公之喪天王之葬不會使微者往而公孫歸父會齊惠公之葬其不顧君臣上下尊卑之等所謂肆人欲滅天理而無忘憚者也

成公五年冬十有一月己酉天王崩

註定王也

十有二月己丑公會晉侯齊侯宋公衛侯鄭伯曹伯邾

子杞伯同盟于蟲牢

孫復曰天王崩晉合諸侯

同蟲牢之盟不顧甚矣

程子曰天王崩而會盟

不廢書同見其皆不臣

胡安國曰天王崩赴告已及在諸侯之策矣以所聞
先後而奔喪禮也而九國諸侯會盟不廢故特書同

盟以見其

皆不臣

薛季宣曰王崩而為

盟會無主之甚也

家鉉翁曰天王崩告命已行於天下而諸侯不戚不
齊相與為此盟無王之罪大矣春秋於王崩之後繼

書同盟
貶也

汪克寬曰是盟乃何休所謂同心為惡惡必成者也
蓋諸侯之同盟實有同外楚之心而不知悖於尊王
之義天子之喪人道始終之大變諸侯相見揖讓入
門而間計則不得終禮況已聞而猶相與會盟不亦
無人心乎春秋之諸侯不知有王故襄王方崩則晉
魯之卿會盟王都之側而不奔喪簡王方崩而邾與
晉衛脩朝聘於魯而不修弔事蓋將以是為常而不
知愧甚者靈王之討音已達於天下而諸侯旅朝於
荆楚且侯致襚執紼越歲踰時而後返而曾
不遣一介行李問國恤於京師也吁可嘆哉

襄公元年九月辛酉天王崩

注簡
王也

邾子來朝冬衛侯使公孫剽來聘晉侯使荀罃來聘

冬註

者十月初也王崩赴未至皆未聞喪故各得行朝聘之禮穀梁范甯註同楊士勳疏知天王崩赴未至者

禮諸侯為天子斬衰天子以九月崩當日即邾子來朝冬初即晉衛來聘魯是有禮之國焉得受之明知赴未至故各得行朝聘之禮也

孫復曰天王崩邾子衛晉之朝聘皆不臣也

胡安國曰簡王崩赴告已及藏存諸侯之策矣則宜以所聞先後而奔喪今邾子方來修朝禮衛侯晉侯方來修聘事於王喪若越人視秦人之肥瘠曾不與焉而左氏以為禮此何禮乎

王孫曰襄公即位則邾子來朝晉衛來聘簡王崩而諸侯無奔喪之事靈王立而諸侯無始見之文當時

狃習流俗不復
知有京師矣

汪克寬曰杜預范甯皆云王崩赴未至故各得行朝聘之禮今考邾子來朝之時謂赴未至於諸侯猶之可也踰月之後安有赴告未及者然歷秋暨冬衛晉不廢聘好縱彼未聞赴而來魯亦豈可晏然受之乎案禮諸侯相見揖讓入門不得終禮者六天子崩太廟火日食后夫人之喪雨霑服失容則廢春秋繼王崩而書朝聘朝者聘者受之者皆有罪也

二十有八年十有二月甲寅天王崩

註靈王也

二十有九年春王正月公在楚

高閔曰公在齊晉多矣闕朝正之禮亦不少矣但書公如齊如晉而義自見也今書公在楚則聖人之旨

深矣二十八年十一月公如楚十二月甲寅天王崩
乙未楚子昭卒公不駕君臣之義以奔天王之喪而
徇荆楚之強以俟楚子之葬久留於楚待夏乃歸故
聖人特於朝正之時書公所在與昭公失國在乾侯
同且以責季氏之無君也

乾學案當天子喪而行郊禮當天子喪而受
與國之朝聘當天子喪而脩禮於他國春秋
皆特書以誌貶諸儒論之甚嚴此諸侯為天
子奔喪制服之舊制也孔氏獨云諸侯可以
脩服於國必不然矣左傳昭公三十年鄭游

吉對士景伯曰靈王之喪吾先君簡公在楚
我先大夫印段實往敝邑之少卿也王吏不
討恤所無也由是觀之簡公若非在楚而遣
卿往則王吏必致討矣此亦一證也

荀子天子之喪動四海屬諸侯

楊倞注屬謂付託之使主喪也

白虎通德論諸侯為天子斬衰三年何普天之下莫
非王土率土之濱莫非王臣臣之於君猶子之於父
明至尊臣子之義也 又曰禮曰天子崩遣使者訃

諸侯王者崩諸侯悉奔喪何臣子悲哀慟但莫不欲
觀君父之棺柩盡悲哀者也又為天子守藩不可頓
空也故分為三部有始死先奔者有得中來盡其哀
者有得會喪奉送君者七月之間諸侯有在京師親
供臣子之事者也號泣悲哀奔走道路者有居其國
哭痛思慕竭盡所供以助喪事者是四海之內咸悲
臣下若喪考妣之義也葬有會者親疏遠近盡至親
親之義也童子諸侯不朝而來奔喪者何明臣子於

其君父非有老少也亦因喪質無般旋之禮但盡悲哀而已

乾學案班固此論視諸儒尤詳愈足證孔氏之謬

孟子舜相堯二十有八載堯崩三年之喪畢舜避堯之子於南河之南

堯老而舜攝也堯典曰二十有八載放勳乃徂落百姓如喪考妣三年四海遏密八音孔子曰天無二日民無

二王舜既為天子矣又帥天下諸侯以為堯三年喪是

二天子矣

疏以舜方攝堯行事未為天子也

乾學案舜率天下諸侯以為堯三年喪禮也

孔子之言特欲明舜未為天子故爾

昔者舜薦禹於天十有七年舜崩三年之喪畢禹避舜之子於陽城禹薦益於天七年禹崩三年之喪畢益避禹之子於箕山之陰

吳越春秋堯崩舜服三年之喪如喪考妣晝哭夜泣

氣不屬聲舜崩禹服三年形體枯槁面目黧黑禹崩
益服三年

通典晉張祖高問士服天王云何要記

賀循所撰

惟道大夫

服君及家臣服大夫耳不說士恐有脫誤鄭云士服君

亦斬衰無明文而雜記云士居堊室此則士制周耶

周即

期年也唐明皇名隆基唐人避嫌名故易以周字

士下吏服士恐亦應同謝沈

答曰朝廷之士服天王斬衰禮之明文也邑宰外任之士居堊室制周要記非脫誤是簡略耳晉尚書問天子

崩於今臺書令史以上皆為服斬衰之服不博士下推
應琳議禮命士以上皆服斬臺書令史列職天朝皆應
服斬又問天子崩今司州及河南郡吏出入導從應易
服制不下推答禮庶人在官者服齊衰三月又近臣服
斬導從出入皆應從服又問從服隨君輕重今司隸服
斬下吏服齊為合禮意不推答凡臣從君皆降一等今
之牧守皆古諸侯以禮相況輕重宜矣又問禮義服不
從今司隸為君斬衰義服也下吏為從不每降一等當

為君喪其親者耳古今行事復云何推答禮庶人為國
君齊今則不服然吏若都官從事有職司於喪庭者故
宜依庶人在官義耳義服不從謂近臣服君斬服之衰
依降一等者之差耳前稱導從指為近臣不謂吏也

魏晉故事云問諸二千石長吏見在京城皆應制服不
博士卞摧楊雍應琳等上云禮臣為君斬衰自士以上
見在官者皆應制服

皇子廣陵王年十一孫為祖服期當從臣服從本親服

應琳議案禮喪服諸侯為天子斬今廣陵王列土建國
古之諸侯宜從臣制

問皇太后三夫人以下皆服斬諸長公主及諸君崇陽
園修容服制之宜卞推等議案禮與諸侯為兄弟者服
斬依禮則公主宜服斬而不杖禮君夫人為長子三年
妾為君之適子與夫人同則崇陽園修容宜三年又問
太后及公主應杖不卞推應琳議禮為夫杖自天子達
皇太后應杖明矣婦為舅姑禮無杖文皇后不應杖也

君之喪夫人世婦在次則杖即位則使人執之如禮三夫人已下皆杖推等又議諸王女孫女為天子服案禮諸侯之夫人為天子其服齊衰本無服者也猶從夫而同今王姑於大行皇帝本服周以輕明重依諸兄弟之義所服至尊疑當服重諸王女依諸侯兄弟禮則應服斬也孫女幼未及於禮若欲服宜依諸侯之制

乾學案此所云皇太后乃嗣皇之母實死者之妻也所云皇姑乃嗣皇之姑實死者之姊

妹也此文主嗣皇而言故云然

開元禮政和禮書儀家禮孝慈錄會典今律文俱不

載

自漢文帝行易月之制羣臣與嗣君同服故諸書皆無之

喪服君

疏此君內兼有諸侯及大夫故文在天子下鄭注曲禮云臣無君猶無天則君者臣之天故亦

同之於父為至尊但義故還著義服也

曲禮於其國曰君

疏其國米地內也與米地內臣民言則自稱曰君

喪服傳君至尊也

注天子諸侯及卿大夫有地者皆曰君疏案周禮載師云家邑任稍地

小都任縣地大都任疆地是天子卿大夫有地者若魯國季孫氏有費邑叔孫氏有郕邑孟孫氏有邶邑晉國

三家亦皆有韓趙魏之邑以其有地則有臣故也士無臣雖有地不得君稱故僕隸等為其長弔服加麻不服也斬

檀弓事君有犯而無隱左右就養有方服勤至死方喪

三年

注有犯無隱謂既諫人有問其國政者可以語其得失若齊晏子為晉叔向言之就養有方不可侵

官也方喪資於事父此以義為制也疏方喪謂比方父喪也

馬賄孟曰君之喪資於父以制之者也其敬同其愛則異故衰麻飲食方於父而其哀不及焉古之人服父之喪自上世以來未有改三年者蓋其情不可變也至於為君之喪以義制故後世之為君服以日易月以月易年而遂除之者止言其服不責以情則其禮亦可從時王之制也

坊記喪父三年喪君三年示民不疑也

輔廣曰示民不疑則君親無異事

喪服四制門內之治恩揜義門外之治義斷恩資於事

父以事君而敬同貴貴尊尊義之大者也故為君亦斬

衰三年以義制者也

註詳二十七卷

喪服小記與諸侯為兄弟者服斬

註謂卿大夫以下也與尊者為親不敢以

輕服服之言諸侯者明雖在異國猶來為三年也

鄭恐彼此俱諸侯為之服斬故注云謂卿大夫以下若

俱為諸侯則各依本服經不云與君為兄弟而言與諸侯為兄弟故知容在異國也然既在異國得為舊君服

斬者以曾在本國作卿大夫今來他國未仕故得服斬也熊安生曰諸侯死凡與諸侯有五屬之親者皆服斬以諸侯體尊不可

以本親輕服服之也
方慤曰兄弟期喪耳而與之服斬
衰者以其為君而有父道故也

陸佃曰禮臣為君斬衰雖兄弟不得以其屬通如是而後君臣之分嚴故期之喪達乎大夫喪服傳曰始封之君不臣諸父昆弟此與諸侯為兄弟者也雖如此猶服斬所臣兄弟可知兄弟如此諸父可知

服問大夫之適子為君夫人太子如士服

注大夫不世子不嫌也士

為國君斬小君期太子君服斬臣從服期疏大夫無繼世之道其子無嫌得為君與夫人及君之太子著服如士服也

乾學案諸侯世及大夫不繼世故諸侯為天子三年而世子不為天子服遠嫌也大夫士皆為君服斬而大夫之適子得如士服不嫌也如此則大夫之庶子與士之子皆可類推

雜記外宗為君夫人猶內宗也

註皆謂嫁於國中者也為君服斬夫人齊衰不

敢以其親服服至尊也外宗謂姑姊妹之女舅之女及從母皆是也內宗五屬之女也其無服而嫁於諸臣者從為夫之君嫁於庶人從為國君疏內宗謂君五屬內之女以經云為君夫人則君夫人者是國人所稱號故知嫁於國中國外當云諸侯也云不敢以其親服服至尊也者案禮族人不敵以其戚戚君則異族者可知

凡外宗內宗皆據有爵者云其無服而嫁於諸臣者從
為夫之君者總謂外宗內宗之女皆然也云嫁於庶人
從為國君者亦內外宗之女並言之則服齊衰三月此
等內宗外宗熊氏云雖嫁在他國皆為本國諸侯服斬
也今依用之若賀循燕周之等云在己國則得為君服
斬夫人齊衰若在他國則不得也今並存焉此外宗與
喪服外宗為君別也故鄭注云外宗是
君之外親之婦此外宗唯據君之宗也

荀子君之喪所以取三年何也君者治辨之主也文

理之原也情貌之盡也相率而致隆之不亦可乎

楊倞

注治辨謂能治人使有辨別也文理法理條貫也原本也情忠誠也貌恭敬也致至也言人所施忠敬尤盡於君者則臣下相率服喪而至於三年不亦可乎詩云愷悌君子民之父母

彼君者固有為民父母之說焉父能生之不能養之

母能食之不能教誨之君者已能食之矣又善教誨

之也

食謂祿康教誨謂制命也

三年畢矣哉

君者兼父母之恩以三年報之猶未畢也

通典魏尚書左丞王昶除陳相未到國而王薨議者或

以為宜齊衰或以為宜無服王肅云王相國本王之丞

相案漢景帝時貶為相成帝時使理人王則國所以封

王相則國家使為王臣但王不與理人之事耳而云相

專為理人不純臣於王非其義也今昶至許昌而聞王

薨姓名未通恩紀未交君臣未接禮不責人之所不能
於義未正服君臣之服傳曰策名委質貳乃辟也若夫
未策名未委質不可以純君臣之義也禮婦人入門未
三月廟見死猶歸於黨不得以六禮既備又以入室遂
成其婦禮也則臣之未委質者亦不得備其臣禮也曾
子問曰娶女有吉日而女死如之何孔子曰壻齊衰而
弔既葬而除之夫死亦如之各以其服如服斬衰斬衰
而弔之既葬而除之也今嬰為王相未入國而王薨義

與女未入門夫死同則哭宜服斬衰既葬而除之此禮之明文也禮曰與諸侯為親者服斬雖有親為臣則服斬衰也臣為其君服之或曰宜齊衰不亦遠於禮乎詔如肅議司空陳羣議諸王相國不應為國王服斬衰古今異制損益不同古者諸侯專國子人至漢初患諸王子強暴奪之權食租而已乃選賢能代王居國相王為善否則彈劾國家置王以下之吏非陪臣之謂也禮記雖有與諸侯為親服斬者蓋謂異於國臣與有親於

王斬耳雖陪臣不親猶不為服豈專帝臣而為蕃王服
斬未有實不為臣而名稱臣若欲假虛名以優王者欲
從君臣而復紕其罪名實既錯君臣義乖遺禮失教難
以為典近防輔小吏尚不稱臣況剖符帝臣而稱臣妾
於蕃王若使正名為王臣則上書當稱陪臣若王正臣
不可不服則不宜還紕王罪若不稱陪臣俱言臣者此
為王與天子同臣也詔曰若正名實司空議是也且謂
之國相而不稱臣制服則亦名實有錯若去相之號除

國之名則傷親親之恩也宜釋輕從重以彰優崇之大義也 喪葬令云王及郡公侯之國者薨其國相官屬長史及內史下令長丞尉皆服斬衰朝晡詣喪庭臨以喪服視事葬訖除服其非國下令長丞尉及不之國者相內史及令長丞尉其相內史吏皆素服三日哭臨其雖非近官而親在喪庭執事者亦宜制服其相內史及以列侯為吏令長者無服皆發哀一日

晉書李含傳含舉秦國郎中令司徒選含領始平中正

秦王東薨舍依臺議葬訖除喪尚書趙浚有內寵疾舍
不事已遂奏舍不應除喪本州大中正傅祗以名義貶
舍中丞傅咸上表理舍曰臣州秦國郎中令始平李舍
忠公清正才經世務實有史魚秉直之風雖以此不能
協和流俗然其名行峻厲不可得掩二郡並舉孝廉異
行尚書郭奕臨州舍寒門少年而奕超為別駕太保衛
瓘辟舍為掾每語臣曰李世容當為晉匪躬之臣秦王
之薨悲慟感人百僚會喪皆所目見也今以舍俯就王

制謂之背戚居榮奪其中正天王之朝既葬不除藩國之喪既葬而除藩國欲同不除乃當責引尊準卑非所宜言耳今天朝告於上欲令藩國服於下此為藩國之義隆而天朝之禮薄也又云諸王公皆終喪禮寧盡乃敘明以喪制宜隆務在敦重也夫寧盡乃敘明以哀其病耳異於天朝制使終喪未見斯文國制既葬而除既除而祔爰自漢魏迄於聖晉文皇升遐武帝崩殂世祖過哀陛下毀頓銜疚諒陰以終三年率土臣妾豈無攀

慕遂服之心實以國制不可而踰故於既葬不敢不除
天王之喪釋除於上藩國之臣獨遂於下此不可安復
以秦王無後舍應為喪主而王喪既除而祔則應吉祭
因曰王未有廟主不應除服秦王始封無所連祔靈主
所居即便為廟不問國制云何而以無廟為貶以舍今
日之所行移博士使案禮文必也放勲之殂遏密三載
世祖之崩數旬即吉引古絕今闔世有貶何但李舍不
應除服今也無貶王制故也聖上諒陰哀聲不輟股肱

近侍猶宜心喪不宜便行婚娶歡樂之事而莫云者豈不以大制不可而曲邪且前以含有王喪上為差代尚書敕王葬日在近葬訖含應攝職不聽差代葬訖含猶躊躇司徒屢罰訪問踧含攝職而隨擊之此為臺敕府符陷含於惡若謂臺府為傷教義則當據正不正符敕唯含是貶含之困躓尚足惜乎國制不可偏耳又含有隴西人雖戶屬始平非所綜悉自初見使為中正反覆言辭說非始平國人不宜為中正後為郎中令又自

以選官引臺府為比以讓常山太守蘇韶辭意懇切形於文墨含之固讓乃在王未薨之前葬後躊躇窮於對罰而攝職耳臣從弟祇為州都督意在欲隆風教議含已過不良之人遂相扇動冀挾名義法外致案足有所邀中正龐騰便割含品臣雖無祁大夫之德見含為騰所侮謹表以聞乞朝廷以時博議毋令騰得妄弄刀尺帝不從含遂被貶退割為五品歸長安

丁潭傳潭為瑯琊王裒郎中令元帝建武元年裒薨潭

上疏求行終喪曰在三之義禮有違制近代以來或隨時降殺宜一匡革以敦於後輒案令文王侯之喪官僚服斬既葬而除今國無繼統喪庭無主臣實陋賤不足當重謬荷首任禮宜終喪詔下博議國子祭酒杜夷議古者諒陰三年不言下及周世稅衰致命春秋之時天子諸侯既葬而除此所謂三代損益禮有不同故三年之喪由此而廢然則漢文之詔合於隨時凡有國者皆宜同也非唯施於帝王而已案禮殤與無後降於成人

有後既葬而除今不得以無後之故而獨不除也愚以
丁郎中應除衰麻自宜主祭以終三年太常賀循議禮
天子諸侯俱以至尊臨人工下之義君臣之禮自古以
來其例一也故禮盛則全其重禮殺則從其降春秋之
事天子諸侯不行三年至於臣為君服亦宜以君為節
未有君除而臣服君服而臣除者今法令諸侯卿相官
屬為君斬衰既葬而除以令文言之明諸侯不以三年
之喪與天子同可知也君若遂服則臣子輕重無應除

者也若當皆除無一人獨重之文禮有攝主而無攝重
故大功之親主人喪者必為之再祭練祥以大功之服
主人三年喪者也苟謂諸侯與天子同制國有嗣王自
不全服而人主居喪素服主祭三年不攝吉事以尊令
制若當遠跡三代令復舊典不依法令者則諸侯之服
貴賤一例亦不得唯一人論於是詔使除服心喪三年
魏書高肇尚平陽公主未幾主薨肇欲使公主家令居
廬制服付學官議正施行尚書訪之常景景以婦人無

疼者胸滿發寒熱亦是痰證痰脈緊而不大瓜蒂散吐之不得謂痰證例無頭疼而以他證參之也傷食右手關脈緊盛而數頭疼發熱惡風但身體不疼中脘痞悶噯噫噎食臭為異耳熱邪伏於脾胃則食不能消經云人迎緊盛傷於寒氣口緊盛傷於食人迎主外風寒入之氣口主中飲食傷之是以有左右手之別中脘痞悶嘔而熱者二陳湯加生薑烏梅寒多不甚熱者治中湯五積散心腹滿痛者大柴胡下之胸膈實而嘔吐者食

在上脘瓜蒂散吐之 夾食傷寒證候按病源云下後
六七日不大便煩熱腹滿而痛為胃中有乾糞亦挾宿
食故也審如是則夾食傷寒即太陰證腹滿時痛桂枝
湯加大黃者是也所以太陰受病主胸膈脹嘔吐飧泄
朱氏以為飲食得之如曰太陰證飲食不節胸膈不快
用理中湯加青皮陳皮或枳實理中丸或二陳湯皆其
治之今推明治法有表者用致中湯去白朮多用青皮
有表復有裏者用桂枝加大黃湯若表證已解但有裏

證者小承氣湯與之可也張氏云傷食者劉大黃三五粒入湯劑中正此意耳雖然夾食傷寒則脾胃已傷暴加轉下不可也復發其汗亦不可也夾食傷寒見吐利厥逆而不挾表證者依陰病及霍亂等治之若吐利厥逆而挾表證者即依先救表之法 虛煩脚氣類傷寒虛煩身首全無痛脉自和平多熱壅轉筋惡食大便難脚氣酸疼而弱腫虛煩諸虛煩熱也不惡寒身不痛頭不疼脉不浮不緊數為異耳重者竹葉湯輕者小柴胡

湯嘔者橘皮湯並不可下陰證虛煩外熱內寒肢節疼
陰旦湯 脚氣初病發熱憎寒頭痛嘔噦惡聞食臭肢
節酸痛大便難或胸滿腹痛卒起而脚轉筋屈弱攣痛
腫重痺頑為異耳脚氣通用三和散降氣湯大流氣飲
烏藥順氣散分氣紫蘇飲木瓜散石楠丸枳殼散用木
瓜煎湯調下毒氣入腹衝心作痛吐涎者降氣湯下養
正丸或用吳茱萸製炒煎熱入生薑汁主之寒多者越
婢湯小續命湯加獨活濕多者除濕湯五苓散痰多者

無適孫適孫猶同庶孫之例要適于死後乃立適孫乃得為長子三年是為父後者然後為長子三年也兄得為父後者是適子其弟則是庶子是為父後者之弟不得為長子三年此鄭據初而言其實繼祖父身三世長子四世乃得三年也云遠別者庶子妾子之號適妻所生第二者是眾子今同名庶子遠別於長子故與妾子同號也祭法云適士二廟官師一廟鄭注云官師中下之士祖禰共廟則此據官師而言不言禰直言祖舉尊而言也鄭注小記云言不繼祖禰則長子不必五世者鄭前有馬融之等解為長子五世鄭以義推之己身繼祖與禰通已三世即得為長子斬長子唯四世不待五世也此微破先師馬融之義也以融是先師故不正言而云不必而已也若然雖承重不得三年有四種一則正體不得傳重謂適子有廢疾不堪主宗廟也二則傳重非正體庶孫為後是也三則體而不正立庶子為後是也四則正而不體立適孫為後是也案喪服小記云

適婦不為舅後者則姑為之小功鄭注云謂夫有廢疾他故若死無子不受重者婦既小功不大功則夫死亦不三年期可知也

馬融曰體者適相承也正謂體在長子之工工正於高祖體重其正故服三年庶子賤為長子服不得隨父服三年故言不繼祖也雷次宗曰父子一體也而長適獨正故曰體既為正體又將傳重兼有二義乃加其服自非親正兼之情體俱盡豈可凌天地混尊親也陳祥道曰所以不得為長子三年不敢重其嗣於下也小記曰庶子不為長子斬者不繼祖與禰故也蓋不繼祖大宗之庶者也不繼禰小宗之庶者也合而言之皆祖也斬言其服三年言其期言斬則知其有三年之期言三年則知其有斬之服蓋亦相為表裏而已教繼公曰祖謂別子也繼祖者大宗子也記曰別子為祖繼別為宗是也此云不繼祖者惟指大宗之庶子而言若小記所謂不繼祖與禰者則兼言大宗小宗之庶子也然經但云父為長子耳傳記乃有庶子不繼祖禰不得為長子三年之

說亦似異於經。殤小功章云：大夫公之昆弟為庶子之長殤公之昆弟為其庶子服。與大夫同則為其適子服，亦三年與大夫同明矣。公之昆弟不繼祖禰者也，而其服乃若是，則所謂庶子不得為長子三年者，其不能無誤乎？

顧炎武曰：知錄家子身之副貳也，家無二主亦無二嗣。故有適子者無適孫。唐高宗有太子而復立太孫，非矣。

喪服小記：庶子不為長子斬，不繼祖與禰故也。

註：尊先祖之正體不二其統也。

言不繼祖禰，則長子不必五世。疏此亦尊宗之義也。然此所明與喪服中義同而語異也。喪服明父是適為長子斬，此明父是庶子不得為長子服斬者也。是互相明也。但經記文混正不知幾世之適，得遂茲極服焉。季長注喪服云：此為五世之適父，乃為之斬也。而鄭注此云：言不繼祖禰，則長子不必五世矣。庾氏云：用恩則禰重，用義則祖重。父之與祖各有一重，故至已承一重而為長子斬，若不繼祖則不為長子斬也。如庾氏此言，則父適二世承重，則得為長子三年也。而鄭不明言世數者，鄭是。

馬季長弟子不欲正言相非故依違而言曰不必也然孫係於祖乃為長子三年而此不云庶孫不得為長子必云庶子者孫語通遠嫌或多世今欲明此祖非遠故言子以示近既義須繼稱言不繼祖自是又曰與稱者庾氏云若直云不繼祖恐人謂據庶子長子死者之身不繼祖故更言不繼祖與稱欲明死者之父不繼祖與稱非據死者之身鄭注喪服云此言為父後者然後為長子三年則是父之適子即得為長子三年此經云必為父適祖適乃得為長子斬者但禮有適子者無適孫雖已是祖正若父猶在則已未成適未成適則不得重長重長必是父沒後者故云為父後者然後為長子三年也然已身雖是祖庶而是父適則應立廟立廟則已長子傳重當祭而不為斬者以是祖庶厭降故不敢服斬且死者其父見在父自供祭然禮為後者有四條皆不為斬何者有體而不正有正而不體有傳重而非正體有正體而不傳重是也體而不正庶子為後是也正而不體適孫為後是也傳重非正體庶孫為後是也正體不傳重適子有廢疾不立是也四者皆期悉不得斬也惟正體又傳重者乃極服耳

春秋桓公六年九月丁卯子同生

胡安國曰適冢始生即書於策與子之法也與子者定於立適傳子以適天下之達禮也故有君薨而世子未生之禮植遺腹朝委裘而天下不亂者以名分素明而民志定也經書子同生所以明與子之法正國家之本防後世配適奪正之事垂訓大矣

左傳襄公三十一年立胡女敬歸之子子野

注胡歸姓之國敬歸襄公妾

秋九月

癸巳卒毀也

注過哀毀瘠以致滅性

己亥立敬歸之娣齊歸之子公子稠穆叔

不欲曰大子死有母弟則立之無則立長

注立庶子則以年

年鉤擇賢義鉤

則卜古之道也

注先人事後卜筮也義鉤謂義等

非適嗣何必娣之子

注子野非適嗣

昭公二十六年王子朝使告于諸侯曰昔先王之命曰王后

無適則擇立長年鈞以德德鈞以卜王不立愛公卿無私古

之制也

注此先王之經疏蓋王后夫人無姪娣之子乃于諸妾之子擇立長耳

乾學案長子受祖宗之重故為之服三年重服制

所以定名分室亂源用意深矣故著於此

通典漢戴聖聞人通漢皆以為父為長子斬者以其為五代之適也馬融注喪服經用之鄭玄注小記則以為已身繼禰便得為長子斬自後諸儒皆用鄭說譙周五經然否曰庶子不為長子斬不繼祖與禰也此但別庶子而不言不繼祖者謂庶子身

不繼禰故其長子為不繼祖合而言之也劉智釋疑亦同此議
晉虞喜廣林難譙周曰禮文三發二言繼祖一言連禰如但繼
禰則應三年何緣須祖煩而失要合子於父舍經就迂非事實
也然則繼祖者必繼禰繼禰者不必繼祖今連禰於祖
以己繼之是繼祖者得三年繼禰者不得也至於連禰
於祖以別高祖之祖故因禰以繼祖別嫌也宋庾蔚之
云案禮鄭注曰用恩則父重用義則祖重父之與祖各
有一重之義故聖人制禮服祖以至親之服而傳同謂

之至尊也已承二重之後而長子正體於上將傳宗廟之重然後可報之以斬故傳記皆據祖而言也若繼禰便得為長子斬則不應云不繼祖喪服傳及大傳皆云不繼祖以明庶子雖繼禰而不繼祖則不服長子斬也賀氏要記云庶子父雖沒猶不為長子三年以已不繼祖也是亦明已身繼祖乃得為長子斬也既義由於繼祖則不必須云及禰或者疑祖之言是道庶子之長故此記特言不繼祖與禰以明據庶子言之也

朱子語類庶子之長子死亦服三年 問周制有大宗乃有立適之義立適以為義故父為長子三年今大宗之禮廢無立適之法子各得以為後則長子少子當為不異庶子不得為長子三年不必然也父為長子三年者亦不可以適庶論也朱子答曰宗子雖未能立然服制自當從古愛禮存羊不可妄有改易也漢時宗子法已廢然其詔令猶云賜民為父後者爵一級豈可謂宗法廢而諸子皆得為父後乎

李良年庶子不得為長子三年辨喪服斬衰章父為長子子夏傳云庶子不得為長子三年不繼祖也禮大傳亦云而小記則云庶子不為長子斬不繼祖與禍故也文雖小異義實不殊其云庶子不得為長子則禮文三發並同也乃後儒以或專言祖或專及稱遂相與聚訟而反略夫並同之文子嘗博考其故而數諸儒立說之未善其善者又不免於疏且混焉則聚訟也宜矣今且就諸說論之謂長子是五代之適者戴聖聞人通漢也馬融嘗用其說以註喪服是必身繼曾祖之人乃得為長子三年也夫曾祖之與祖則有別矣禮言不繼祖而我必謂之不繼曾祖其義何居乎此則鄭玄嘗辨之矣謂長子是四世之適者賀循虞喜庾蔚之也孔穎達賈公彥嘗用其說以補鄭注之未及是必身繼祖之人乃得為長子三年也斯蓋守適適相承二重之義者也夫用恩則父重用義則祖重乃竝重之文非重祖而輕父也今曰身承

二重乃得遂長子之服然則父必連祖而後重乎且
禮言庶子不得為長子三年而我必曰繼禰之適子
亦不得為長子三年其義又何居乎此皆吾所謂立
說之未善者也若鄭玄然周則可以為善矣玄之注
喪服傳曰庶子者為父後者之弟也小記兼禰此專
言祖容祖禰共廟由此則小記之文與喪服傳大傳
之文意不相悖其說辨矣然周曰不繼祖與禰者謂
庶子身不繼禰故其長子為不繼祖合而言之也此
又善通乎小記之意與鄭玄之說者也然則身繼禰
之人即得為長子三年其說固無可易矣要而言之
均是長子也或為之服或不為之服以長子之所承
不同也長子而止為繼禰之子耶其禰即庶子也固
不敢以承己之私而為之服斬長子而為繼祖之孫
耶是即所謂將承二重者也而豈得不為之服斬乎
故凡言不繼祖者自是就長子言而虞喜賀循庾蔚
之必謂就庶子言抑知庶子即不繼祖而猶繼禰則

是為父後者也而尚得槩之以庶子乎喜之難庶周曰合子於父舍經就迂又自為之解曰小記言不繼祖與禰者連祖與禰乃以別高祖之祖然則經傳之言祖者多矣將總總焉慮其無別於高祖之祖而一為之辭乎吾恐庶周之解不得謂之迂而喜之解未可云經也賀循要記云既義由於繼祖則不得云及禰或者疑祖之言是道庶子之長故小記特言不繼祖與禰以明據庶子言之嗟乎此其意先有所執而遷傳記之意以相就也亦吾所謂迂也是故有取乎鄭玄庶周之說也獨惜鄭玄以師事馬融之故不敢直斥其非但於小記條下僅有不必要五世之語不復明言世數又凡不繼祖之文竝對長子而發玄亦未嘗特著其義遂以啓後世之紛紜至賈公彥乃謂鄭特據初而言則并玄之意亦晦矣吾所謂說之善者又不免於疏且混焉斯則鄭玄之過也故得為之說曰庶子不得為長子三年者大宗小宗之庶子也

以其長子不繼祖故也曰義以相準將不獨大小宗之庶子也凡別子為祖繼別為宗彼別子亦不得為繼別者服也以別子不得禰先君故也舍此二者則皆得為長子三年矣不亦簡而該也與是故從馬融諸儒之說則傳記當云庶子庶子之適庶子之適庶子皆不得為長子三年從賀循諸儒之說則傳記當云庶子庶子之子繼禰者並不得為長子三年乃傳記皆無其文然則諸儒或自為之說則可而又何以重誣傳記為哉今有甲於此疏其名列其事事固係乎甲也論者從而實之以乙又實之以丙則忘乎其名為甲矣而乙與丙得毋有不任受者乎諸儒之論何以異此杜佑曰後之儒者多用鄭說我謂將不用馬氏說耳信鄭則未也故為辨又曰庶子不得遂長子服予既主鄭玄譙周之論而或進而請曰是說也清江教繼公氏又嘗疑之謂庶子亦得為長子三年然與否與予曰此顯與傳記相悖者也吾嘗聞

其詞矣。教氏云：據殤小功，章公之昆弟為其庶子與大夫同，則其為適子亦當三年。與大夫同公之昆弟，不繼祖禰者也。而其服乃若是，是則庶子不得為長子三年也。誤也。予則謂教氏於是乎失言矣。禮為庶子不杖期，大夫為庶子則降一等而服大功為庶子殤，則又降一等而服小功。庶子有降服，無加服。此與父之繼禰不繼禰無所係者也。為長子三年者，以繼體傳重，故加隆焉。雷次宗所謂加服是已。此與父之繼禰不繼禰有所係者也。而欲以服庶子例長子，則誤矣。且教氏信以為大夫之服長子必三年，與大夫不敢降其宗，以此推之，則大夫而身為庶子，亦當不得遂三年之服也。所服同而大夫獨異經，則別為之條者，不一若其身為庶子亦服長子三年經文無據而欲以大夫例公之昆弟，且即公之昆弟以例儿為庶子者，則益誤矣。故曰教氏於是乎失言也。從教氏之斷，則傳記皆可廢矣乎。是故謂庶子之長是五世

之適四世之適者殤於禮內者也謂庶子亦得遂其
長子服者執於禮外者也吾疑傳記多矣於其無可
疑者疑之
嗚呼難矣

乾學案喪服傳曰庶子不得為長子三年不
繼祖也鄭注曰此言為父後者然後為長子
三年喪服小記曰庶子不為長子斬不繼祖
與禰也大傳曰庶子不得為長子三年不繼
祖也此三章禮文及注義甚明世之說者多
非其義於是聖人所以加隆祖後以尊其父

之意反致蒙晦而不通此乃禮家之誤也所謂庶子不為長子三年以己不後父也故雖封始之諸侯別子之大夫而降其大宗之適不得禰先君故也其繼禰之宗則非例矣說者以其後庶子而不得遂此實禮文所未有也今案先儒著說略有數端戴聖聞人通漢馬融輩主五世之適五世之適是繼高祖之宗也賀循虞喜庾蔚之孔穎達賈公彥輩主

四世之適四世之適是繼曾祖之宗也經明
云庶子不云庶子之子明云繼祖不云繼祖
之祖父所謂五世四世之適豈經義乎譙周
曰不繼祖與禰者謂庶子身不繼禰故其長
子為不繼祖劉智釋疑曰案喪服傳與小記
皆云庶子不為長子三年不繼祖與禰也兩
舉之者明父之重長子以其當為禰後也其
所繼者於父則禰於子則祖也衆說之中無

踰此二說者蓋經云不繼祖者謂此長子不繼祖也非謂庶子也不繼祖與禰者自長子言之為不繼祖自庶子言之為不繼禰也庶子非繼禰之宗故不敢以承己之重而為之極服若夫庶子之適則固後其父矣彼何所嫌而忍降其子以薄其父乎禮家妄移不繼祖之文加之庶子此其所以誤也至教繼公引殤小功章而謂庶子不得為長子三年記

文為誤是說者不知何所見而敢於違經其
繆妄又甚戴賀諸君矣朱子語類答問者一
條其云宗子雖未能立服制自當從古此主
父為適庶子服而言其服制斬衰條止云父
為適子當為後者也亦不云繼祖庶子為適
子之服並無明文愚謂禮經此條專主庶子
而為長子三年惟當以繼禰之宗為斷繼禰
而不遂服是禰其祖而不知有父也不繼禰

而遂服是不忍其子而不知有父也禮之設
豈以訓無父者哉然則五世四世庶子之云
者非經義決矣

開元禮政和禮書儀家禮竝同孝慈錄改齊衰不杖
期今律文因之

讀禮通考卷四